

## PABLO NAAJIONEE ÉFESO TIACAJINIA QUINIAA PUEYASO PUEYACUARA

*Pablo saruhuatasacari Jesucristo tojtiajaca*

<sup>1</sup> ¿Niaate quiyajaa cuarta Pueyaso pueyanaa? Janiyari Pablóni, Jesucristo jiyaramiquishano na rupaa cua po-huatanura, taa na Que Pueyaso paniquiaaricuajani. Ni-aacuara naajianijia, canapue Pueyaso saquiriojoquiaari tama neracuajani, canapue te Jesucristo tojtianaacuajani.

<sup>2</sup> Pa Que Pueyaso, mariyata pa Jiyaniijia Jesucristo cuaara taraajeera niaacua, maninia na miiniuria niajanija. No-jori cuaara cajitiiria nioojia pueyaracaanujuhuj.

*Taa Pueyaso miiquiaa pajaniyani Cristo rupuesano pa quishacari*

<sup>3</sup> Pa Jiyaniijia Jesucristo Queeri Pueyaso. Nojuaja pa shuquiritiare. Neyanu Jesucristo pa rupuenuucua, Pueya-soori capora pajaniyara. Nojuajaari jiyano-hua maninia miiquiaa pajaniya, puetunu jiyocuacaanu na jii-tiasano cumaacatajanaa. <sup>4</sup> Pueyaso niishishacari taa Neyanu miiniutianiya pocuarani, jiya shipiniyaquishacarijia, no-juajaari tari pa saquiriojoquiaari na shuriucua quijiaca pa quiniuria. Pa saquiriojoquiaarijiaariuhua na tojiji-aca pa quiniuria, tojetaarucuajanaa sesa miyashijia pa quiniuriajuhuaj. <sup>5</sup> Panijia na quiniuucua, nojuajaari pa saquiriojoquiaari na muerasura na jiyatenura pajaniya, Jesucristo jaara maninia miiri pajaniyara. Pueyasoori naa miiquiaa pajaniyatej, taa tariucuacaanu na niishiriojo-quiaari na miiniuria pajaniyacuajani. <sup>6</sup> Jiyano-hua maninia na panishano Niyanuniyojua miiniuucua pocuara, no-juajaari pueyaracaanu jiyanooquiaa pajaniya. Nojuajaari

jiyanohua capora. Naa maninia na miiniuucua pajaniyatej, paari cunora pueyaracaanu na maniniuhuaqueetaquiaani. <sup>7</sup> Niyacutesanojinia Neyanu shootenuucua na nanaca pocuara, Pueyasoori pa jiyanooquiaari na muerasu pa quiniuria. Naaratej, majaari Pueyaso sanitionu quiniutianiya pajaniya. Puetunu sesa pa miishanojinijijianaa pa jiyanooquiaariiri. <sup>8</sup> Pueyasoori na paniniu niishitiquiaari pajaniya, na niqutiosacari na niishitiaja pajaniya, puetunu casaa niishijijianaa pa quiniuria. <sup>9</sup> Nojuajaari jiyanoohua tariucuacaanu niishiriojoquiaari taa na miiniutianiya puetunu na shipinishanoocarajanaani. Quiari naataja saniniuujia, nojuajaari jiyasohua na miiniu panishano niishitiquiaari pajaniya. <sup>10</sup> Pueyanaa, nia niishiri casaa Pueyaso miiniutianiyan. Nojuajaari Cristo jiyatenutaniya Jiyaniijijianaa na quiniuria. Naacuajitij, puetunu jiyocuacaanu quijiacajanaa, mariyata puetunu mijiria quijiacajanaari na tojijiacara quiniutianiya. Nojuajaari naa tohuateenutaniya tamacari, taa tamajaaja na niishiriojoquiaaricujani.

<sup>11</sup> Pueyasoori tariucuacaanu pa saquiriojoquiaari Neyanutaja na cojiritianura pajaniya, maninia na miiniuria pajaniya. Pueyasojuaanaari tariucuacaanu naa niishiriojoquiaari maninia na miiniuria pajaniya. Nojuajaari pueyaracaanu tohuateequiaa taa na miiniu paniquiaaricujani, niishijia na quiniuucua. <sup>12</sup> Nojuajaari pa saquiriojoquiaari maninia quijiacara na jataniniuria pajaniya. Cuarta Judiocuacajinijinio pueyani, canaari coteenujanaa Jesucristoocua tiuuquiaarini. Naa jiyanoohua maninia Pueyaso miiniuucua canaa, nojuaja cuara maniniuhuaqueetasaaria jiyanoohua. <sup>13</sup> Quiari naataja nia tojishacari Jesucristo rupaa, niaari cuno seetanu rupaacuajanaa tiuuquiaarijiuhuj, Pueyaso muerasura jatanishano nia quiniuria. Naa nocua nia tiuuniuucuatej, Pueyasoori Neyanu nia rpuetequiaari. Na Sohuanu niqutioquiaari nijaniyajaariuhuj taa

na sequequiaaricujani. Naacuaji niishishaaquiaari, niaari seetanujuanaa Pueyaso muerasu. <sup>14</sup> Pueyaso Sohuanuraca pa quishacari, paacuajaari niishiyani, paari puetunu Pueyaso sequesano Neyanuranojuanaa masenutaniya Neyanutajuhuj. Pueyaso Sohuanu pa jiitiasacari, paari niishiyani, Pueyasoori pa rijionutaniya puetunu na saquiriojosano pueyatajanaa, na muerasu pa quiniuria na shuriucua. Jiyacaritij, paari tojetaarucujanaa jatanishaanutaniya juhua Neyanu pa niquishaanurajuhuj. Cunora, Pueyasoori jiyanohua maniniuhuaqueetasano quiniutianiya, jiyanohua maninia na miiniucua pajaniya.

*Taa Pablo secojoquiaari Pueyaso pueyacuarani*

<sup>15</sup> Janiyari niajanijajiniji tojiriucuaani, taa pa Jiyani-ijia Jesuucua tiujujaca nia quiyani, taa parta Pueyaso pueya panijiacaa nia quiyajaaniuhuj. <sup>16</sup> Cunora, pueyara-caanu cua secojosacari niaacuara, majaari cua tarinitianu quiquiaa Pueyaso cua sequenura “paacarasho”, maninia na muerasu nia quiniucua. <sup>17</sup> Pa Jiyaniijia Jesucristo Queeri shacantushiqui quijia na cumaacajinia. Janiyari niaacuara na secojoquiaani, nojuaja niqutionura niajaniya jiyocuacaanuji niishitiaja. Naacuaji nia naata niishiniu na niishitiniu panishano niajaniya, maninia nia niishiniuria nojuajuhuj. <sup>18</sup> Janiyari niaacuara secojoquiaajaaniuhuj, Pueyaso cuara cuhuataara nioojia, maninia nia niishiniuria casaara Pueyaso saquiriojoquiaari niajanijaniya, casaa na miiniutianiya niaarajaniuhuj. Janiyari niaacuara secojoquiaajuhuj, maninia nia niishiniuria taa Pueyaso muerasu jiyatesaanutaniya shacantuuca quijiacaa nojori quiniuriani. <sup>19</sup> Janiyari secojoquiaajuhuj, Pueyaso cuara niishitiiria na cumaaca niajaniya, cuno, nioojiajinia poonijiyani. Na cumaacaari jiyanohua, puequeyashijia. <sup>20</sup> Pueyasocujajaari cuno na cumaaca poonitijioquiaari Cristo quetejinia, nojuaja

jaara na samiitiani quiaariuhua macujiniji. Jaara na samiitiani quiaari, cuno na cumaacata na cajitiquiaariiri Jiyaniijajanaa cajitiujinia na miaquetajara jiyocuacaanu. <sup>21</sup> Tii na cajitiquiaariiri puetunu tamasaca cumaacaraca quijiaca Jiyaniijajanaa na quiniuria. Majaari tamonu socua cumaacaraca quijsa quiniu pa Jiyaniijajiniji. Nojuajaari puetunu tamasaca jiyaniijianucujanaa Jiyaniijia. Puetunu mijiria quijsa jiiitasanojuanaari na casaa. Nojuajaari puetunu casaajanaa camaru. Pueyaso jaara quiarinio jiya shipiniriohua, Jesucristoori jiyacari Jiyaniijajanaa quiniutianiyajuhuj, taa quiarjsa na quiyacujani. <sup>22</sup> Naacujajitij, Pueyasoori puetunu na shipinishanojuanaa jiyatequiaari Jesucristo jiiitasocoriquiano. Naajuhuj, Pueyasoori Jesucristo jiyatequiaari na saquiriojosano pueya jiiitariquiano, canapueete nocua tiuujjacacujani. <sup>23</sup> Pueyaso saquiriojosano pueyari juhua Jesucristo cuaqueya. Nojuajaari juhua poojsa saniniuujja, pa jiiitiana na quishacari. Puetunu Pueyaso saquiriojosano pueyajanaa jaara Cristo cuaqueyajinia rupueete saare, Cristo cuaqueyari tucuateenutaniya seetanujuanaa maninia jeecanamitishano na quiniuria. Na cuaqueya pa quishacari, nojuajaari puetunu poojjajinijanaa quiya. Naajuhuj, nojuajaari puetunu tiquiyocujanaa quijsajuhuanajaj.

## 2

### *Panjsa Pueyaso quiniuucua, nojuajaari pa jiyanooquiaari*

<sup>1</sup> Sesa mijsa nia quiniuucua tarijsa, Pueyaso tojjashijiacajuhuj, niaari macunucua quijsa Pueyasora. <sup>2</sup> Njaa jaara naa sesa mijsa quijsa quijsaari, niaari juhua puetunu mijiria quiniaa Pueyaso tojjashijiacajanaa quijsaari. Njaari samaruhua jiyaniijia tojjajacajacajanaa, cuno, paratu piyarojosaqui quijsani. Nojuajaari Pueyaso tojjashijiacajanaa shiniujjia, nojori miiniuria sesa, taa Sesaaca seque panijacujani.

<sup>3</sup> Tariija, puetunu pajaniyajanaari Pueyaso tojiyashijiaca quiquiaarini. Paari tama pa miiniu panishanojuaaja miijiaca quiquiaarini. Naacuajitij, paari puetunu pa cuaqueya miiniu panishanojuanaa miijiaca quiquiaarini, puetunu sacuaraatia pa niishiriojosanojuhuaj. Naa sesa miijiaca pa quiniuucuatej, paari tojetaarucuajanaa jiyanohua Pueyaso saniitiosocoriquiano quiquiaari juucuani, juhua tamasaajuhuj. <sup>4</sup> Saniniuujia, Pueyasoori pocua taraajeja cutara. Jiyanohua pa paniquiaariiri. <sup>5</sup> Cunora, macunucua pa quishacariija nera, sesa miijiaca pa quiniuucua, nojuajaari Jesucristota pa cojiritiaquiaari samiitianijionu. Jiyanootio Pueyaso quiniuucua, nojuajaari nia jiyanooquiaari. <sup>6</sup> Naa na samiitianijionuucua pajaniya Casticocua pa tiuuniuucuatej, Pueyasoori tari pa tacanijioquiaari Cristota jiyocuacaanu, tii Cristo cajitianura pajaniya. <sup>7</sup> ¡Naa Cristota na cojiritianuucua maninia miiniu pajaniyatej, cunoori jiyanohua maninia! Nojuajaari naa pa miiquiaaritij, puetunu quijiacajanaa nio pa quishacari nuhuaji niishiniuria maatia, Pueyasoori jiyanohua pa panijia. Maatia niishishaanutaniyari Pueyasoori tojetaarucuajanaa jiyanootio cutara, na jiyanooniuucua pajaniya, Neyanuucua pa tiuuniuucua. <sup>8</sup> Naa Pueyaso quiniuucua jiyanootiotej, nojuajaari nia jiyanooquiaari saaja Jesuucua nia tiuushacari. Majaari tama nia miishanotajaaja Pueyaso nia jiyanootiniu quiquiaari tama niajanijajaaja. Pueyasojuaanaacuajaari nia jiyanooquiaari niaacua na taraajenuucua. Naajuhuj, nojuacuajaari nia tiuutiquiaari Neyanuucua. <sup>9</sup> Majaari Pueyaso jiyanooniu quiquiaari pajaniya, maninia miijiaca pa quiniuucua. Paa jaara maninia pa miiniuucua Pueyaso jiyanootiquiaari tama pa cuaqueyajaajani, paa maara tama pa cuaqueyajaaja timitiarenii juhua najuhuana pocuaja. <sup>10</sup> Shushajanaa Jesucristoocua pa tiuushacari, Pueyasoori jiyacari pa jataniquiaari quiarino pueyano pa quiniuria, maninia miijiaca pa quiniuria. Nojuacuajaari

tari naa niishiriojoquiaari, maninia miijiacara na jataniniuria pajaniya.

*Jesucristoori pa jiyateja jiyanoootiojuacara*

<sup>11</sup> Éfeso tiacajinia quiniaa pueyanaa, quiarijia nia niishiriohua taa nia quiquiaari tariucuacaanuni, Pueyaso muerasu nia quiyaquishacarijia. Niaari cuarta Judiocuaca soosano taucuaca quiquiaari, nia cararaatiuuquia co miatesoo quiyaquiniuucua. Canaa cutaraari canaa cararaatiuuquia co miatesanoni. <sup>12</sup> Nia niishirijihuaj, naa nia quishacaritij, niaari Cristooju quiquiaari. Majaari nia naata rupuenu quijia Pueyaso saquiriojosano Israel pueya. Puetunu Pueyaso sequesanojuanaa Israel pueyanoni, cunoori maja niaarano quiquiaari. Majaari nia niishiniu quiquiaari Pueyasoori pueyacuaji Tacuriquiano jiyaronutaniya mijiria. Majaari quenaaja tamonu quiniu quiquiaari nocua nia tiuuniuria, Pueyaso na jiyanootiniuria nijaniya. Niaari saaja taraatia shaajeriquiano quiquiaari. ¿Cantucua niaacua taraajereni? Niaari seetanujuanaa tojetaarucujanaa Pueyasooju quiquiaari mijiria. <sup>13</sup> Tarijia, niaari seetanujuanaa tucuacaanu quijiaca quiquiaari Pueyasojiniji. Quiarijia saniniuujia, Jesucristo shootenuucua na nanaca niyacutesanojinia, niaari nata rpuetootesaaquiaari, nocua nia tiuushacari. Naacuajitij, niaari canaa rupuejajuhuaaj. <sup>14</sup> Cristocuajaari pa jiyanoootiootequiaari. Moisés Rootasanoni, cunoori juhua jiyaconaja sohuaca quiquiaari pa tajinia, maja nia cojiniuria canaa, maja nia rupuenura canaajuhuaaj, taucuaca nia quiniuucua. Jesucristocuajaari cunora tama na cuaqueyajaaja tarinitiaquiaari na mosaanura pa niti, cuno jiyaconaja sohuaca niyartasaanura, pa juaaquiaca tajiyatenura. Naacuajitij, nojuajaari pa jiyatequiaari juhua niquiriyatu queecujinio supueno pueya, Judiocuaca, nijaniya taucucanio. <sup>15</sup> Naa pa niti Jesucristo cusonuucuatej, nojua-

jaari puetunu Moisés Rootasanojuanaa sanaajaquiaari, maja socua na sesacanura pajaniya. Tarijia, paari juhua caapiqui tiaca quiquiaarini. Paari pueyaracaanu para-caatioojua quijiani. Quiarijia saniniuujia, Jesucristo cusonuucua, nojuajaari pa jiyanootequiaari jatiqui pa quiniuria juhua niquiriyatu tiaca, mariyata na rupuejaca pa quishacari. <sup>16</sup> Naaratej, janiyari socua camiya nia sequenuni. Cristo cusonuucua niyacutesanojinia, nojuajaari Pueyaso jiyanootequiaari pajaniya, na panishano muerasu pa quiniuria puetunujuanaa, niajaniya taucuaca, canaajuhuj. Naacuajitij, Jesucristoocua pa tiuushacari, paari juhua niquiriyatu tiaca nerani.

<sup>17</sup> Niajaniya taucacanaa, niaari juhua tucuaaanu quijaca quiquiaari Pueyasojiniji. Canaa cutaraari juhua cateca quijia nojuajinijini. Jesucristoori mijiria niqiaari, na niishitiniuria puetunu pajaniyajanaa taa Pueyaso jiyanooni paniya pajaniyani. <sup>18</sup> Cristo jiyanootequiaari na Que Pueyaso pajaniya, naacuajitij, pa naata pa Que Pueyaso rupueni pa secojosacari nojuaja, mariyata na Sohuanuraca pa quishacari, niajaniya, canaajuhuj. <sup>19</sup> Jesuucua tiuujia nia quishacari quiarijia cua panishano pueyanaa, majaari tari nia quiniu tahue canaara. Majaari nia quiniu juhua tamonu tiacajinijinio rucoona. Quiarijiani, niaari seetanjuanaa Pueyaso pueya cutara. Pueyasoori maninia nia jiiitajuhuj, taa na jiiitajuhuj puetunu na saquiriojosano pueyacuani. <sup>20</sup> Pueyaso pueya nia quiniuucua, niaari rupuetesano puetunu Pueyaso muerasutajanaa, juhua shanohua tia pa quiniuria Pueyaso quiquiora. Jesucristo jiyaramiquishano pueya na rupaa pohuatariquianoni, mariyata na sequenu panishano caminiujuninaa pueyani, nojoriiri juhua cuno tia pacaariana. Saniniuujia, Jesucristoori juhua cuno tia morijijiana cutara, cuno tia nujuatana. <sup>21</sup> Pueyasoori na saquiriojoquiaa Neyanuucua tiuuriquiano pueya, na quiquiorano na tucuatana. Cuno tia tucuateesacari, to-

jetaarucujanaa maninia jeenucuasano quiniutianiya pa Jiyaniijaraari. <sup>22</sup> Niaari naajuhuj, Cristo nia rupuesacari, niarta Pueyaso pueya nia rupuesacarijuhuaj, Pueyasora, niaari juhua rianaa, tucurunio. Nojuajaari nia morojotaquiaa na tia na tucuatatura, na Sohanu quiquiorano.

### 3

#### *Pabloori Pueyaso jiyaramiquishano taucuacaaca*

<sup>1</sup> Jesucristojiniji cua pohuatanuucua niarta taucuaca, janiyar cunora nujuatesano quiya nujuatejojuajiniani.

<sup>2</sup> Niaa naasucuaari niishiyacuja Pueyasoori cua jiyaramiquiquiaari Jesucristojiniji cua pohuatanura taucuaca, jiyanooshano nojori quiniurijuhuj.

<sup>3</sup> Tariucuacaanu, majaari pueya niishiniu quijia, Pueyasoori taucuaca jiyanooniutianiyajuhuj, taa na jiyanooquiaacuaa Judiocuacani. Pueyasojunaacujaari naa jiyasohuja na miiniu panishano cua niishitiquiaaritij, taa shusha nio cua naajio coteejajinia cua pohuataa nijaniyacujani. <sup>4</sup> Niaa jaara cua naajionee serojore, niaari jiyacari seetanujuanaa niishiniutianiya, janiya cutaraari Jesucristo rupaa niishijiani. Naacuajitij, janiyar niishiyani taa jyanohua maninia nia miishaanutaniyani nocua nia tiuushacari.

<sup>5</sup> Tariucuacaanu, majaari quenaaja tamonu pueyano niishiniu quijia nio jiyasohuja Pueyaso miiniu panishano. Quiari naataja saniniuujia, Pueyasoori na jiyaramiquishano pueya niishitiquiaari cuno, jiyasohuja na miiniu panishano taucuacani. Na sequenu panishano caminiujiunia pueya na niishitiquiaarijiaariuhuj. Pueyaso Sohanucujaari cuno canaa niishitiquiaari.

<sup>6</sup> Nijaniya taucuacanaa, niocuajaari Pueyaso miiniu panishano jiyasohuja nijaniya: Jesucristoocua nia tiuuniuucua, Pueyasoori puetunu Judiocuacarano



na sequesanojuanaa jiyatenutaniya niaarajuhuj. Canaari Judiocuacani. Naajaa, Jesucristoocua nia tiuuniuucua, Pueyasoori canaa rpuetequiaa niajaniya, juhua niquiriyatu pueyano pa quiniuria nera. Naajuhuj, cunora, Pueyasoori nia niqutioquiaa na Sohuanujuhuj, taa na sequequiaari Neyanu Jesucristoocua tiuujiacacuajani.

<sup>7</sup> Janiyari Jesucristo ruuretaja quiquiaarini. Naajaa, jiyanohua cumaacaraca Pueyaso quiniuucua, nojuajaari cua jataniquiaari Neyanu Jesucristojiniji pohuatana cua quiniuria. <sup>8</sup> Jesucristo paraca cua quiniuucua tarijia, janiyara, janiya cuaara socua rerequetesano pueyano quiri puetunu cuarta Pueyaso pueyajinijijianaa. Saniniuujia, jiyanohua jiyanootio Pueyaso quiniuucua, nojuajaari cua jiyanooquiaari. Cua jiyatequiaariiri seetanu rupaajanaa Neyanu Jesucristojiniji pohuatana cua quiniuria taucuacara. Janiyari cunora Pueyaso shuquiritiaa jiyanohuani. Cristo jiitiasano pajaniyaranoni, puetunu cuno casaajanaari pa niishishoojua. <sup>9</sup> Tariucuacaanu, Pueyasoori puetunu casaajanaa shipiniquiaari. Na shipiniyaquishacarijia, Pueyasoori tari niishiriojoquiaari casaa na miiniutianiya puetunu pajaniyarajanaani. Naajaa, tariucuacaanu, majaari na niishitiniu quiquiaari pueya. Nio pa quishacari saniniuujia, nojuajaari cua seerataquiaari puetunu pueyajanaa cua niishitiniuria jiyasohujaja na miiniu panishano. <sup>10</sup> Pueyasoori tariucuacaanu pajaniyara na niishiriojosano racataquiaari pueyaracaanu tama na niishitijajiniaajaaja. Saniniuujia, nio pa quishacarini, nojuajaari na niishitiquiaari. Quiarjiani, jiyanohua maninia Pueyaso miishacari puetunu na saquiriojosano pueyajanaa, puetunu jiyocuacaanu cumaacaraca quijiacajanaari niishiya, Pueyasoori seetanujuanaa jiyanohua niishijia cutara. Naacuajitij, Pueyaso seya, Satanás, samarhuanio, nojoriiri tacuriitia

shootiaquiaa pajaniya, Pueyaso miiniuucua maninia pajaniya, niishijia na quiniuucua. <sup>11</sup> Quiari naataja, Pueyasoori tariucuacaanu na miishocoriquiano na niishiriojosano tohuateequiaari pa Jiyaniijia Jesucristo cusosacari niyacutesanojinia. <sup>12</sup> Naacuajitij, Jesucristoocua pa tiuuniuucua, pa naata juhuajaniya rupuenu na Que Pueyaso pa puereyaquiniutia. <sup>13</sup> Naa Pueyaso miiniuucua pajaniyaratej, majaari nioojia nia niquijiotenu Pueyasooquaji nia puerenuta naquiya cua miishacari. Naa naquiya cua miishacari Jesucristojiniji cua pohuatanuucua nijaniyatej, shuquiriaatia nia quiri juhuari. Naa naquiya cua miishacaritij, cuno cuaara shiniujiuuria nijaniya, socua pa Jiyaniijia tojijiaca nia quiniuria.

*Pablo secojosano Éfeso tiacajinia quiniaa Pueyaso pueyacuara*

<sup>14</sup> Naa Pueyaso muerasu nia quiniuucua juhuaj, janiyari mojoquetaquiaani pa Que Pueyaso cua secojonura niaacuara. <sup>15</sup> Nojuacuajaari Que cutara. Puetunu queyajanaari na sesaatiaacuaja. Nojuajaari puetunu parta Pueyaso muerasujanaa Que, mijiria quiniaa, tariucua jiyocuacaanu quiniaa Pueyaso muerasunio. <sup>16</sup> Naa nia Que na quiniuucua juhuaj, janiyari niaacuara secojoquiaani, nojuaja cuaara cumaquiiria jiyano hua nijaniya na Sohuanuta nioojiajinia. Na Sohuanuuri puetunu pa panishanojuanaa jiiitiana. <sup>17</sup> Naajuahuaj, niaacuara secojoquiaanijia, seetanusujanaa nia niishiniuria Jesucristojuanaacuajaari nioojiajinia quijia. Nojuajaari nioojiajinia quiya quiarinio pueyara na jataniniuria nijaniya, nocua tiuujia nia quishacari. Naacuajitij, niocua niishiri taa Jesucristo paniya jiyano hua nijaniyani. Naacuajitij, majaari nioojia nia niquijiotenu quiniutianiya socua. <sup>18</sup> Naa Jesucristo paniniu nia niishishacari taritij, niaari puetunu Pueyaso pueyatajanaa niishiniutianiya taamuecate Cristo

paniniuni. Naajuhuj, niaari seetanujuanaa niishiniu-tianiya tee na paniniu pueetaani. Jesucristo paniniu jaara shanacujusaatia quiri shanacujutajata, paa maara nocua puequeetejore najuhuanani. Seetanujuanaa, majaari pa naata shanacujununoj. Paa jaara na jamatu, na tucuanee, na queroni, na jiyaconaja shanacujunu paniriquiani, majaari na puequeeja pa riuriatanu quiniutianiya. <sup>19</sup> Seetanujuanaa, majaari pa naata niishiniu taa jiyanoehua na paniya pajaniyani. Naajaa, janiyari niaacuara secojoquiaa Pueyasoni, seetanujuanaa nioojiata nia niishiniuria cuno, na paniniuni. Naa jaara na paniniu niishiri, Pueyasojuanaari nioojiajinia quiniutianiya. Naacuajitij, niaari tojetaarucujanaa panijiaca quiniutianiya taa Pueyasocuaani.

<sup>20</sup> Naa Pueyaso miiniuucua maninatej, nojuaja cuaara shuquiritiasaaria. Naa jiyanoehua na cumaacata na poonijosacari poojiajiniatej, nojuajaari na naata miiniu socua jiyanoehua queraatia pa masanojiniji nojuaja, pa niishiriojosanojinijinio. <sup>21</sup> Puetunu quijiacajanaa cuaara niishiiria Pueyasoori jiyanoehua maninia. Nojori cuaara naa niishiiria nojori niquishacari Pueyaso jatanishano na saquiriojosano pueya, Jesucristo miishanonio. ¡Cuaara naa shuquiritiasaaria pueyaracaanutej!

## 4

### *Pueyaso Sohuanu pa jiitiasacari, paari rupuetootesano quijiani*

<sup>1</sup> Janiyari niya nujuatesano quiyani pa Jiyaniijajiniji cua poojotanuucua. Cunora, cua tojitiare. Janiyari nia sequeyani, saaja pa Jiyaniija tojiaca nia quiri, seetanujuanaa maninia na muerasu nia quiniuria. Pueyasocujaari nia saquiriojoquiaari naa maninia na muerasu nia quiniuria. <sup>2</sup> Majaari niarta Pueyaso pueya rerequetajaca nia quiniu. Maninia miitiojuaca nia

quiriquia. Puetunu casaajanaa rejeretajaca nia quiriji-  
 uhuj. Naa jiuujiaatiojuaca nia quiri nia panitioosacari.  
<sup>3</sup> Naa Pueyaso jiyanootiotesacari nijaniyatej, pueyara-  
 caanu nia jiyanootiore, juhuajaniya nioojia quiniuria  
 juhua rupuetootesano. Pueyaracaanu naa nia miiri  
 Pueyaso Sohanu cumaquishacari nijaniya. <sup>4</sup> Naa qui-  
 jiaca nia quiri pueyanaa, niquiriyatu cuaqueyaraca pa  
 quishacari pa Jiyaniijara, mariyata niquiriyatu Soha-  
 nuraca pa quishacarijuhuaj. Naa Jesucristoocua tiu-  
 ujiaca pa quishacaritij, Pueyasoori puetunu pajaniya-  
 janaa rijionutaniya, pueyaracaanu na shuriucua pa quini-  
 uria. <sup>5</sup> Puetunu pajaniyajanaari niquiriyatu Jiyaniijara-  
 cani. Nojuajaari Jesucristo. Naajuhuj, puetunu pa-  
 janiyajanaari saaja Jesucristo rupaacua tiuujiacani, maja  
 tamonu rupaacua. Naajuhuj, puetunu pajaniyajanaari  
 moojinia tiuquinijosaaquiaarini, Jesucristo pa jiyate-  
 sacari pa Jiyaniijara. <sup>6</sup> Naajuhuj, saa niquiriyatujua  
 Pueyasoori quiya. Nojuajaari puetunu Neyanuucua tiu-  
 ujiacajanaa Que. Nojuajaari puetunu na tojjiacajanaa  
 Jiyaniijia. Nojuajaari puetunu na pueyajanaa poonijiteya  
 na panishano nojori miiniuria. Puetunu na muerasu  
 jiuujiaajanaari na quiquio.

<sup>7</sup> Saniniuujia pueyanaa, puetunu pajaniyacujaari tari  
 jiitiaa tamaatia poonijosano pa miiniuriani, teyano Cristo  
 niqutionu paniquiaari pajaniyacujani. Naacuajitij,  
 puetunu pajaniyajanaari maja pa niishiniu miiniu saa  
 niquiriyatu casaaja. <sup>8</sup> Tariucuacaanu Pueyaso Rupaa naa-  
 jiotasanojiniji, paari niishiyani Pueyasoori na Sohanu  
 niqutionu paniquiaari na pueya. Cunora naa sequeya  
 Jesucristojiniiri:

“Na quioosano pueya tacataquiaariuhua jiyocuacaanu-  
 uri. Nareja na niqutionu panishano casaa sero-  
 taquiaari na pueyari”.

<sup>9</sup> Jaara sequeya “tacaquiaariuhua”, cunojiniji paari  
 niishiyani nojuaja jiyocuacaanuji rosequiaari coteenu,

taraatia mijiria na mosaanura pocuara. <sup>10</sup> Nojuajani, jiy-  
ocuacaanuji rosequiaarini, nojuajaari tojetaarucuajanaa  
jiyocuacaanu tacaquiaariuhua, Jiyaniijajanaa na quini-  
uria na Que shuriucua. Tacaquiaariiri puetunu jiya ca-  
jiniocuajanaa na mishininiuria na cumaacata, puetunu  
jiyajanaanio. Naacuajitij, nojuajaari puetunu tiquiyocua-  
janaa quijia. <sup>11</sup> Nojuacuajaari noojiaqueya na saquirio-  
josano pueyajinijinio jiyatequiaari na jiyaramiquishano  
pueya nojori quiniuria. Saniniuujia, tamasaca jiyate-  
quiaariiri Pueyaso sequenu panishano caminiujiuniaa  
nojori quiniuria. Saniniuujia, tamasaca jiyatequiaari-  
iri Jesucristo niishiyashijiaca niquiara poojotanaa nojori  
quiniuria, Pueyaso jiyanooniuria nojorijiuhuaj, Jesucua  
nojori tiuushacari. Tamasaca jiyatequiaariiri na tojitia-  
jaca pueya jiitianaa nojori quiniuria. Tamasaca jiyate-  
quiaariiri na rupaa niishitiojonaa nojori quiniuria narta  
Pueyaso pueyara. <sup>12</sup> Naacuajitij, Jesucristoori na So-  
huanuta cumaquiquiaa cana na paniyani, puetunu tamaa-  
tia na miiniu panishanojuanaa nojori miiniuria. Naa  
na pueya cumaquiquiaa na Sohuanutaari na saquirio-  
josano pueya tiuuniuria nocua, nojori cumaquishaanu-  
rajuhuaj. Naa Jesucristoocua tiuujica pueya canesacari  
socuatej, Jesucristo cuaqueyari canequiaa. <sup>13</sup> Jesucristora  
poonijionaa pueyari naa poonijioquiaatej, paa cuaara  
tojetaarucuajanaa pa Jiyaniijia tojijiaca quirijiaatijia,  
juhua rupuetootesano pa quiniuria. Cristo pueyari naa  
poonijioquiaa Pueyaso Sohuanu cumaacata, paa cuaara  
seetanujuanaa Pueyaso Niyanu niishijiaca quirijiaati-  
jia. Naacuajitij, paari tojetaarucuajanaa jeenucuasano  
quiniutianiyani, seetanujuanaa juhua Jesucristo pa quini-  
uria. <sup>14</sup> Naacuajitij, majaari tari pa quiniu quiniu-  
tianiya juhua naatujua. Niaacuajaari niishiya naatu-  
jooriiri na niishiriojosano jatanijia ritia. Noojia niqui-  
jiotejajaariuhua. Naa juhua tariucua cumueeca mashaja

pa quishacaritij, majaari quenaaja tamasaca naata saponu quiniutianiya pajaniya, tamaatia nojori niishitiojosanota. Cuno pojori naa tamaatia niishitiojonuujuaca tariucua pa niishishanojinijini, nojoriiri jiyanohua saponu niishijiaca, nojori tojitiajaca na tashuquiootenura Pueyasojiniji. <sup>15</sup> Nocuaji pueyanaa, Pueyaso Rupaata pa cumaquitioojore seetanujuanaa pa panitioonuta, Cristo rupuejaca pa quiniuria socua. Nojuacuajaari juhua poojia. <sup>16</sup> Pueyanaa, niaacuajaari niishiya, puetunu pa cuaqueyajiniacuma casaa pa jiitiasanojuanaari maninia rupuetootesano. Puetunu cunojuanaa jaara maninia poonijioquiaa jatiqui, paari maninia quiyani. Pueyaso muerasuuri juhua pa cuaqueya jiitiasano casaa. Naacuajitij, puetunu Pueyaso muerasujuanaa jaara tama na poonijosanojuuaaja miiquiaa maninia taa pa Jiyaniijia paniyacujani, pa Jiyaniijia cuaqueyari maninia canenutaniya, jatiqui rupuetesano pa quishacari, seetanujuanaa panitiojuaca pa quiniuria.

*Cristoocua tiujujacaari quiarinio pueya*

<sup>17</sup> Jesucristo jiyaramiquishano pueyano cua quiniucua, cua tojiri pueyanaa. Pueyaso saquiriojosano pueyania quishacari, maja socua nia quiniu taa Pueyaso niishiyashijiaca pueya quiyacuaani. Nojoriiri najuhuaan quijiaca, najuhuaan nojori niishiriojonuucua. Naajuhuj, nojoriiri tama na panishanojuuaaja miijiaca, najuhuaan casaacua nojori jiaatianuucua. <sup>18</sup> Nojoriiri naa quijiacatej, juhua ninishiqui nojori niishitiaja quiniuucua. Nojoriiri seetanujuanaa niishiyashijiaca, nojori tojiyaquiniuucua Pueyaso, juhua cumueeca jiuujiaraca nojori quishacari. Majaari nojori jiyatesaanu quiniutianiya Pueyaso muerasura, pueyaracaanu shuquiriaatia quijiaca nojori quiniuria. <sup>19</sup> Naa pueyaracaanu sesa nojori miijonuucuatej, nojoriiri maja tari na niishiniu caririquiniu, sesa nojori

miishacari. Nojoriiri puetunu tama na miiniu panishanojuaaja miijiaca. Nojoriiri puetunu sacuaraatia casaa-janaa miiniuucua jiyartuucono. <sup>20</sup> Niajaniya saniniuujia, majaari naa nia niishitiojosaanu quiquiaari Cristojiniji, naa sacuaraatia miijiaca nia quiniuria. <sup>21</sup> Naa jaara Jesujiniji tojiquiaari, niaacuajaari niishiquiaari na rupaari seetanu rupaajanaa cutara. Niaacuajaari na rupaajiniji niishitiojosaaquiaari maninia miijiaca nia quiniuria, sesa nia miiniu nia tarinitianurajuhuj. <sup>22</sup> Pueyanaa, pa toque mocua jaara mocuaatia jaanure, paari ritia na jocuajani. Naa nia jatarejuhua sacuaraatia miiniu nia niishishano. Sesa nia miiniu panishanoori tama nia sapojoquiaarijiaaja naa sesa miijiaca nia quiniuriatej. <sup>23</sup> Quiarjia saniniuujia, sesa nia niishitiaja nia jatare, maninia niishitijaraca nia quiniuria, maninia jiuujiaracanio. <sup>24</sup> Seetanujuanaa juhua quiarinio pueyano nia quiri, quiarinio jiuujiaraca, Pueyaso niquitosano nijaniya. Naa quiarinio jiuujiaraca nia quishacaritij, seetanujuanaa juhua Pueyaso pueya nia quiriquia, maninia miijiaca, tojetaarucujanaa sesa miyashijiaca. Naa maninia nia quiniuni, cunoori seetanujuanaa Pueyaso Rupaa nia tojinuuucua.

<sup>25</sup> Naacuajitij pueyanaa, majaari socua cuaracashijionujuaca nia quiniu. Pueyaso pueya pa quishacari, puetunu pajaniyajanaari juhua pa Jiyaniijia cuaqueyani. Cunora, puetunu nia sequesanojuanaa niarta Pueyaso pueyano cuara quiiria seetanujuanaa.

<sup>26</sup> Naa jaara juaatishaare, tama nia cuaqueyajaaja nia cojuare maja nia juaaniutia sesa nia miiniuria niarta pueyano. Naajuhuj, nia jaara juaari, majaari nia juaaquiaca nia ninitianu. <sup>27</sup> Ritia nia jeecatoore, Sesaaca mariqui sesa nia miitiriiri nia jiyanoyaquishacari.

<sup>28</sup> Nio nia tojirijihuj. Cante nohuasejovia quiyajaani, cuara tarinitiaara nohuasejonu. Saniniuujia cuara poonijioora tama na numatucujatajaaja cutara. Naacua-

jitij, nojuaja na naata na jiitiasanojiniji nareja niqutionu tamasa, cante na panishano jiitiaaquiyan.

<sup>29</sup> Naajuhujaj pueyanaa, majaari sacuaraatia casaa nia pocuanu quenaaja. Majaari cararaatia nia puenujutoonujuhujaj. Saaja maninia pocuajaca nia quiri cutara. Naacua-jitij, nia naata niarta Pueyaso pueya niishitiojonu. Nia naata nojori cumaquiniu. Nia naata nojori nacasunujuhujaj. Naacua-jitij, nia naata nojori shiniujiuniu saaja Pueyaso tojjijaca nojori quiniuria. <sup>30</sup> Majaari sesa miijiacaa nia quiniu, niaa mariqui nioojiajinia quijia Pueyaso Sohuanu taraajoreeri. Pueyasocuajaari juhua na sesa naajiotaquiaari poojiajinia na Sohuanuta. Naacua-jitij, na rijionu juuca pajaniya, nojuajaari niishiniutianiya paari na saquiriojosano pueyani.

<sup>31</sup> Pueyanaa, majaari jiyano-yashijia nia quiniu. Seetanujuanaa jiyanoojiaca nia quiri cutara. Majaari tamasa shanacunu niaacua, na nasojonura nijaniya. Majaari nia juayonuujutanu. Majaari nia juaaniutia nia nacajonu. Majaari niarta pueyano paracaajia nia quiniu, nia juaaniutia nia sesacanura nojuaja. Naacua-jitij, puetunu juaaniujianaa nia tarinitiare, puetunu sesa nia miiniujianaanio. <sup>32</sup> Saniniuujia, maninia miitiojuaca nia quiri. Taraajetoojuaca nia quirijihujaj. Naajuhujaj, jiyanoootiojuaca nia quirijihujaj, taa Pueyaso jiyanooquiaari pajaniyacuaani, Neyanuucua pa tiuushacari.

## 5

### *Seetanujuanaa juhua Pueyaso pueya nia quiri*

<sup>1</sup> Pueyanaa, niaacuajaari Pueyaso panishano muera-suniyojua. Cunora, pueyaracaanu juhua nojuaja nia quiniuria nia saniniujiuri. <sup>2</sup> Puetunu nia miishanojuanaa nia miiri nia paniniutia, taa Jesucristo paniquiaari pajaniyacuaani. Jiyano-hua na paniniuucua pajaniya, nojuajaari tama na cuaqueyajaaja tarinitiaquiaari pa



niti na mosaanura. Naa na miiniuucuatej, nojuajaari Pueyaso shuquiritiquiaari jiyanoehua. Na miishanoori juhua shanoehua jaanutaja quiquiaari Pueyasora.

<sup>3</sup> Pueyaso pueya maanujinijinio nia quiniuucua, majaan nia camishoo maaji nia numuetucunu, maajishuriu, casaanio. Cunoori jiyanoehua sacuaraatia Pueyasora. Majaan quenaaja jiyano sacuaraatia casaajiniji nia pocoojonu. Naajuhuaaj, majaan tamasaca jiiitiasanoocua jiaatijaca nia quiniu. <sup>4</sup> Majaan najuhuaana sacuaraatia pocuajaca nia quiniu. <sup>4</sup> Majaan najuhuaana nia niti nia taquiriocuatenu juhua maninia pocuaja. Naajuhuaaj, majaan sacuaraatia puenujunuujuaca nia quiniu. Puetunu cuno sesa pocuanujuanaari sesa Pueyaso pueyara. Saniya nia pocoojore cutara Pueyaso miishanojiniji, socua pueya maniniuhuaqueetanura Pueyaso. <sup>5</sup> Niaacuajaari tari niishiya, cante juhujaniya na camishoo maajipohua numuetucujuani, maajishuriuhuanio, nojoriiri jiyanoehua taraatia quiniutianiya. Pueyaso jiiitiasano na tojijiaca pueyaranoni, majaan na quiniu quiniutianiya na miijiaca pueyara. Naa taraatia miishaanutaniyajaariuhua puetunu tamasaca jiiitiasanoocua jiaatijacajanaa. Pueyasora, jiyano pueyari jiyanoehua sesa, juhua juaashiquiata shipinijosano pueyasohua secojonuujuaca. <sup>6</sup> Naacuajitij pueyanaa, majaan nia shanacunu tamasaca sapojonura nijaniya na sequesacari naa sacuaraatia miishanoori maja sesa, sacuaraatia pocuanunio. Naa pueya miiniuucua sesatej, Pueyasocuajaari juaatishaare. Tari saniitioya na tojiyashijiaca pueyari. <sup>7</sup> Cunora pueyanaa, majaan quenaaja naa sacuaraatia miijiaca nia cojinuu.

<sup>8</sup> Pueyaso niishiyashijiaca nia quishacarijia tarijia pueyanaa, niari ninishiqui quijiaca quiquiaari. Quarijia saniniuuja, pa Jiyaniijia rupuejaca nia quishacari, Pueyasoori nia jiyatequiaari cuhuashiqui quijiaca nia quiniuria. Cunora, seetanujuanaa maninia miijiaca nia

quiri, juhua cuhuashiqui quijiaca. <sup>9</sup> Paa jaara seetanujuanaa cuhuashiqui quijiaca quirini, paari maninia miijiaca quiniutianiyani. Naajuhuj, paari tojetaarucuajanaa sesa miyashijiaca quiniutianiyani. Paari seetanujuanaa Pueyaso Rupaa tojijiaca quiniutianiyajuhuj. <sup>10</sup> Naajuhuj pueyanaa, niaa cumaati niishiya, ¿puetunu nia miishanojuanaate pa Jiyaniijia maniniucuasano, maja soj? <sup>11</sup> Majaari ninishiqui quijiaca nia cojiniu, nojori jaara sesa miya. Saniya nojori nia nacasure juhuari. Maninia nia miishanojiniji, nojoriiri niishiniutianiya nojori miishanoori tojetaarucuajanaa sesa. <sup>12</sup> Jiyasohua nojori miiijosano sacuaraatiaari tojetaarucuajanaa jiyanohua cararaatia. Puhuataaquishoo. <sup>13</sup> Saniniuujia, pa nacasusacari nojori Pueyaso Rupaata, paari nojori jiuujia cuhuataquiaani, nojori niishiniuria nojori miishanoori seetanujuanaa sesa. <sup>14</sup> Pueyaso Rupaacuajaari nojori jiuujia cuhuataquiaa na cumaacata, cuhuashiqui quijiacara nojori na jataniniuria. Cunora, naa naajiotasano quiyari tariucuacaanu Pueyaso Rupaajinia:

“¡Maqueyanonaa, quia niucuaire! ¡Macunucua tajiniji quia sanere, Pueyaso Jiyarosano cuhuatanura quiajaniya!”

<sup>15</sup> Naacuajitij cua panishano pueyanaa, tama nia cuaqueyajaaja nia cojuare jiyanohua, seetanujuanaa maninia miijiaca nia quiniuria. Majaari juhua niishiyashijiaca nia quiniu juhuajaniya. Seetanujuanaa niishijiaca nia quiri, maninia miijiaca nia quiniuria. <sup>16</sup> Nio pa quishacarini, sesa miiniuuri socua caneya puetunu juucajanaa. Majaari pa niishiniu taate tariqui quiniutianiyani. Naaratej, jaara pa naata quiri quia maninia pa miiniuria, maninia pa miiri puetunu juucajanaa. <sup>17</sup> Majaari moseeca nia quiniu. Maninia nia niishiri casaa pa Jiyaniijia paniya nia miiniuriani.

<sup>18</sup> Naajuhujaj, majaari nia mashaasequejonuunu. Niaa jaara mashaaseca quiriquia, majaari nia rejetenu quiniutianiya sesa nia miiniu panishacari. Saniya Pueyaso Sohuanu nia shanacure niaacua cutara, nioojia na mishininiuria na cumaacata, seetanujuanaa cumaacaraca nia quiniuria, shuquiriaatia quijiaca nia quiniurijuhujaj. <sup>19</sup> Naa Pueyaso Sohuanuraca nia quishacaritij, tariucuacaanu Pueyaso Rupaajinia naajiotasanojiniji jaaquequejonu nia naminiujiutioore. Naajuhujaj, quiari naataja Pueyaso Sohuanu niishitiojosano nia jaaquequejotoore. Nia jaaquequejosacari, pa Jiyaniijia nia shuquiritiare puetunu nioojiatajanaa. <sup>20</sup> Pueyaracaanu puetunu casaarajanaa pa Que Pueyaso nia sequere “paacarasho” pa Jiyaniijia Jesucristoocua tiuujiaca nia quiniuucua.

*Taa quijia pa quiyani Pueyaso tojjia pa quishacari*

<sup>21</sup> Pueyanaa, maninia tojitioojuaca nia quiri, taa pa Jiyaniijia Cristo paniyacujani. Nojuajaari pa Jiyaniijia cutara.

<sup>22</sup> Maajipohuanaa, nia niyaca tojjijia nia quiri, taa pa tojiquiaa pa Jiyaniijiacuaani. <sup>23</sup> Nia niyacaari juhua nioojia quiya niaara, taa Jesucristo quiya na saquiriojosano pueya jiuujiacuaani. Nojuajaari pocuaji Tacuna, juhua na cuaqueya pa quiniuucua nera. <sup>24</sup> Naacujitij, taa Jesucristo saquiriojosano pueya na tojtiajaca quiyacuaani, maajipohua cuara naa pueyaracaanu neyaca tojtiajaca quiirijuhujaj.

<sup>25</sup> Canuunaa, nia niquiocohua nia paniri taa Jesucristo na saquiriojosano pueyarano paniquiaaricuaa jiyanohuani. Nojuajaari cunora tama na cuaqueyajaaja tarinitiaquiaari na mosaanura. <sup>26</sup> Nojuajaari naa miiquiaariti seetanujuanaa nerano pa quiniuria. Tojetaarucujanaa maninia pa quiniuria, nojuajaari poojia jeequequiaa na rupaata, naatej, taa pa jeequequiaacuaa pa cuaqueyani. <sup>27</sup> Paa jaara

tojetaarucuajanaa tari jeequejosano quirini, pa Jiyaniijajanaari pa tiuquinitianutaniya tama nocuajaaja, tariucua jatanishano shacantuucara. Jiyacaritij, paari tojetaarucuajanaa sesa miyashijia quiniutianiyani. Paari seetanujuanaa shanohua niquishano quiniutianiyani, juhua camishocoriquiano maniniushitishano niyacoo, tojetaarucuajanaa jyanohua cohuajaque toqueraca. <sup>28</sup>Pueyanaa, taa nia paniyacuaa tama nia cuaqueyajaajani, naa nia paniri nia niquiocuajuhuj. Cante necocua panijiani, nojuajaari juhua tama na cuaqueyajaaja paniya. <sup>29</sup>Majaari quenaaja tamonu pueyano quiniu tama na cuaqueya soojeajaaja. Paacuajaari maninia cojuaja pa cuaqueyani. Paari maninia na mianuutequiaani, naatej, taa Jesucristo cojuaquiaa na saquiriojosano pueyacuaani. <sup>30</sup>Puetunu na saquiriojosano pueyajanaari juhua na cuaqueya nera. Paacuajaari na cuaqueyajinijinioni. Naaratej, nojuajaari maninia pa cojuaquiaa. <sup>31</sup>Cunora naa naajiotasano quiyari tariucuacaanu Pueyaso Rupaajinia. Naa sequeyari:

“Pueyano jaara camiri, nojuaja cuaara shiriquiiria na que, na nucua shuriucuaji, necocuata na quiniuria. Jaara camiri, nojoriiri juhua niquiriyatu cuaqueyaraca quiniutianiya”.

<sup>32</sup> Pueyasojuanaacuajaari pa niishitiojoquiaari, pueyanoori juhua niquiriyatu cuaqueyaraca quijia jaara camiri necocuara. Cunoori miriqui pa niishitiojiya, puetunu Pueyaso saquiriojosano pueya maanujuanaari juhua pa Jiyaniijia niquiorano quiya, juhua niquiriyatu cuaqueyaraca pa quiniuria nata. <sup>33</sup>Pueyanaa, cunojuanaari cua pohuatasano pa Jiyaniijia cuaqueyajiniji. Saniniuujia, puetunu cuarta Pueyaso pueyanaa, nia niquiocua panijiaca nia quiri juhua tama nia nia cuaqueyajaaja. Naajuhuj, puetunu maajipohuajanaa cuaara neyaca tojijiaca quiiria.

## 6

<sup>1</sup> Muerasunaa, pa Jiyaniijia tojjiaca nia quishacari, nia queya tojjiaca nia quirijihuaaj. Naa jaara naa miiritij, cunoori jiyanoehua maninia Pueyasora. <sup>2</sup> Tariucuacaanu Pueyaso Rootasanojiniji Moisésni, naa sequeyajaariuhua tamonu rootasano:

“Nia que tojjiaca nia quiri, nia nucuanio. <sup>3</sup> Naa nia miiritij, pueyaracaanu shuquiriaatia nia quiniuria, pueyaracaanu nia rishiniuria mijiria, niaa cuaara saaquianoshirijiaatijia”.

Nio rootasanoori coteenujuanaa rootasano tee Pueyaso sequeyacuajani taa na tojitiajaca na miiniutianiya maniniani.

<sup>4</sup> Niajaniya saniniuujia pueyanaa, majaari nia niquiohua nia juaatijionu najuhuanaj. Nojori nia canashitijiore maninia. Nia niishitiojore maniniajuhuaaj. Nojori nia nacasurejuhuaaj. Jaara nia tojitiaaquiri, na pishiniuria, nia majacuriquianoj nojori nia paniniutia, maja nia juaaniutia. Naa nia miiritij taa pa Jiyaniijia paniyacuajani.

<sup>5</sup> Niajaniya poonitijiosano pueyanaa, mijiria nia camaruhua tojitiajaca nia quiri. Majaari nojori nia rerequetenu. Puetunu nojori sequesanojuanaa niajaniya nia miiri nia puerenuta, niaa mariqui saniitiosareeri nojori sequesano nia miyaquiniuucua maninia. Nojori sequesano nia miiriquia maninia, juhua pa Jiyaniijia Jesucristora. <sup>6</sup> Majaari maninia nia poonijionu saaja nojori niquishacari niajaniya, nojori shuqiritianura niajaniya. Maninia nia poonijiore pueyaracaanu puetunu nioojitajanaa, seetanujuanaa juhua Cristora. Naa jaara naa maninia poonijionuujuaca quiriquiatej, niaari Pueyaso panishano miyajuhuaaj. <sup>7</sup> Puetunu nia poonijiosanojuanaa nia poonijiore shitimia, juhua Pueyasora. Majaari nia miishano nia poonijionu nia taajenuta, juhua niarta pueyanora. <sup>8</sup> Niaacuajaari tari niishiya, pa Jiyaniijia Jesucristoori puetunu pajaniyajanaa niqutionutaniya

maninia pa miiniuucua mijiria, poonijotesano pueya, camarnuuju pueyano.

<sup>9</sup> Niajanijahuaj seya jiitiajicanaa, nio sequesano nia tojiri. Maninia nia jiitiare nia poonitijosano pueya. Majaari na miananajonu. Nia niishirijihuaj, niaari mariyata niquiriyatu Jiyaniijiaraca, nijaniya, nojoriijihuaj. Nojua-jaari jiyocuacaanu quijia. Naaratej, tamonu pueyanoori maja rimiajata nera, narta pueyanojiniji.

*Taate pa naata Sesaaca nujuatanuni*

<sup>10</sup> Quiarjia cua panishano cuarta Pueyaso pueyanaa, seetanjuanaa pa Jiyaniijia rupuejaca nia quiri, jiyanhua cumueeca nioojia quiniuria jiyanhua na cumaacata.

<sup>11</sup> Puetunu Pueyaso niqutiosano casaajanaa nia cushiyore juhua toqueya, Sesaaca sapojiyaquiniucujaji nijaniya. <sup>12</sup> Pueyaso pueya pa quishacari mijiria, majaari pa quiaquetojonu quiquiaa pueyanota. Pa coopueeri maja pueya. Nojoriiri cumaacaraca quijiaa jiya cajiniocua. Sesaacaari cuno na samaruhua jiyatequiaari jiyaniijianucua nojori quiniuria mijiria. Naacuajitij, nojoriiri cumaacaraca, ninishiqui quijiaa pueya nojori jitianura. Nojoriiri Pueyaso paraajuhuj. <sup>13</sup> Naaratej Pueyaso pueyanaa, puetunu Pueyaso niqutiojosanojuanaa nia paracata nia miaquetojotaqueya nia cushiyore. Naacuajitij, sesashiquiari niocua na nujuatare, Sesaaca saniniujiushacari nijaniya. Naa jaara naa nioojia jeenucuare juhuacarijia puetunu Pueyaso casaatajanaatej, niaari nia paraa nujuatajaca quiniutianiya.

<sup>14</sup> Pueyanaa, niaacuajaari niishiya taa miaquetojojuate pueyani. Na miaquetonu panishacari, nojoriiri shoquejiniji casaa na cajiniocua morotaja. Na turtuconee cushiyonuujaari, puetunu na jiriquiajanaa na mishiquionura cashiicujaji. Naajuhuj, na sapatuhua cushiyonuujaariuhuj. Na nareenee pootujuaari, nocujaji na nujuatajara cashi. Naajuhuj, na naca na cojuatajara, cumoco

casaa cushiyonuujuaari. Na nijiniaquetucuaaja mueruu pootujuajaarihuaj.

Pueyaso pueya pa quishacari saniniuujia, tama nia cuaqueyajaaja nia jeenucuare Pueyaso casaata. Naacua-jitij, seetanujuanaa Pueyaso Rupaa niishijiaca nia quiri maja nia sapojosaanura. Cunoori juhua pa cajiniocua camarucujua casaa saniniuujia. Pueyaracaanu maninia miijiaca nia quiri, nioojia nia cojuanura Sesaacaacuaaji, nojuaja mariqui nia cararoreeri niaa jaara sesa mi-iri. Cunoori juhua nia turtuconee nia cushishano. <sup>15</sup> Pueyaracaanu jeenucuasano nia quiriquia juhua tari-ucua sapatu cushinio. Naa tariucua pueca nia quiriquia nia quianura, pueya nia pohuatanura Jesujiniji. Naa nia pohuataretej nojori niishiniuria Pueyasoori nojori jiyanooni panijahuaj. <sup>16</sup> Naajuhuj, pueyaracaanu nia tiuuri Jesucristoocua. Naa Jesucristoocua nia tiuuniuni, cunoori juhua nia nareenee Sesaaca cashi nishitiumiacaca nia nujutajara niaacuaaji. <sup>17</sup> Nia niishishacari niaacua-jaari Pueyaso jiyanooshano pueya, cunoori seetanujuanaa juhua cumoco nia cushishano nacaque, maja nioojia nia niquijiotenura Pueyasoocuaaji. Naajuhuj, Pueyaso Rupaa nia niishiri maninia. Cunocuaajaari Pueyaso Sohuanu nijiniaquetucuaaja mueruu, pueya jiuujiajinia na pooni-jionura. <sup>18</sup> Naajuhuj Pueyaso pueyanaa, majaari nia tarinitianu Pueyaso secojonuunu. Na Sohuanu cumaacata Pueyaso nia secojonuuriquia pueyaracaanu, naajuhuj, na Sohuanu niishitishacari niajaniya casaacuara nia sec-ohonutaniyani. Majaari secojonu nia tarinitianu nia taa-jenuta. Juhua sutejaca pueyaracaanu nia secojonuuriquia puetunu niarta Pueyaso pueyacuarajanaa. <sup>19</sup> Naajuhuj, cucuara nia secojonuure, Pueyaso niquitionura janiya na niishitiaja, maninia cua pohuatanura Jesujiniji cua puereyaquiniutia. Cucuara nia secojorejuhuaj, maatia cua niishitiniuria pueya, Pueyasoori puetunu pueya-

janaa jiyanooniua paniya saaja Jesucristoocua nojori tiu-ushacari. <sup>20</sup> Pueyasojuanaari cua jiyatequiaari na jiyaramiquishano cua quiniuria, na niti cua pohuatanura na rupaa pueya niqiara. Janiyari cunora niya nujuatejojuajinia morotasano quiyani. Naaratej, cucuara nia secojore seetanujuanaa, Jesucristojiniji cua pohuatanura cua puereyaquiniutia.

*Pablo pohuatasano Tíquicojiniji*

<sup>21</sup> Pa panishano Tíquicocuaajaari niaacua quianutaniya, puetunujuanaa na pohuatanura janiyajiniji, naajuhuj, casaa cua miyani. Nojuacuajaari shamaatia poonijiojua pa Jiyaniijia. <sup>22</sup> Janiyacuajaari cunora niaacua na jiyaroyani, nioojia nia cumanijianura canaajiniji nia tojishacari, taa canaa quiya niyani.

<sup>23</sup> Pa Que Pueyaso, mariyata pa Jiyaniijia Jesucristota, nojori cuara cuniqui quiniaa parta Pueyaso pueya jiuujia cajitiiria, juhuajaniya nia quiniuria. Nojori cuara nia jiyateera panitiojuacarajuhuj, seetanujuanaa Jesucristoocua tiuujia nia quiniurajuhuj. <sup>24</sup> Naajuhuj, Pueyaso cuara puetunu pa Jiyaniijia panijiacajanaa cumaquiiria na Sohuanuta, shuquiriaatia nojori quiniuria, cuno pojori, canapuate seetanujuanaa Jesucristo panijiacacujani.



Quiarinio pueyaso rupaa pa jiyaniijia Jesucristojiniji  
pueyano rupaajinia

New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

### Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

